



大山嶺个仔民

一山層一山，彎幹過撇還係彎幹，深坑水隨山勢轉，係太極圖項柔美个弧線。青山疊翠，雲堆雲，引擎聲隨山壁傳往上、透落坑底，和諧个鳥聲，玄玄風分這雜入來个機械聲打斷，蟲、鳥禁聲，時間、空間跔核恬撇，山林肚單淨伸著引擎，在該抽核另命。司機个手抓核方向盤，目珠叮(den+)緊頭前个狹路，正手片、左手片幹無停，車肚个人圓身乜跔核晃無停，該載在胃腸抗議愛翻肚進前，來到山嶺頂咧。

梨山个隔壁鄰舍——新佳陽部落，係一個泰雅族人个部落，這兩日厥等舉辦成人禮活動，擲著衫尾，佢跔姪女一陣人上山來。一落車，散下氣，歸身鬆爽，涼沁沁个空氣係這時節山下人个想望。天然个冷氣、無汙染个清甜空氣，戴這位个人正正有福氣。傳統个迎賓舞，帶來鬧熱个氣氛。同客人共款，傳統个東西斯像老古董个樣，係老輩人个代名詞，兩日个活動，種菜、做綑、打獵、編織……，逐關个關主做下係有歲數个泰雅族民。一個活動，部落肚个所有大人細人全動員，這個舅，該個叔，親親戚戚分人分不清，到底麼人同麼人正係一屋人啊？細人乜共樣，無分大抑細，喊喊喝喝搞共下，大人無閒、細人歡喜，迂在大人身邊隨大人差遣，跋往上、飄到落，講族語、講華語，使得講一個部落斯係一家人，這係厥等个民族性，係對天地該項學著來个包容。這情景，同老頭擺个客人，戴伙房屋个年代，毋係共樣？

臨暗个雨，分人料想毋著，原旦安排好个「營火晚會」，臨時徙去古邁茶園个大工寮辦。焙歸下晝，錫去大家口涎水落落跌个該隻山豬，斯用貨車直接載上工寮。活動照常進行，雖然有遺憾，毋過原住民个熱情無減，唱歌、跳舞、講古……大家還係搞都當暢。

講著古邁茶園，腦膈肚斯浮出該像三歲子樣个面容。毋係皮膚，毋係動作，係該像厥屋脣鼠尾草樣个笑神，哪部分接觸著斯哪位留香；係該像茶園頂高烏森林肚，泉水樣个清淨目神，接目，斯分人有雨過天清恁泥樣个安寧。該大山嶺樣个堅韌個性，堅持回歸大自然个農作方式，分厥茶園名聲，透到國外去。海拔兩千兩百公尺，氣候、水質一等好个所在，這個矮矮細細个細阿妹，放棄都市个好頭路，接續厥爸个茶園，同天、同地做朋友。兩公頃个茶樹，逐頭都係厥細人，用天地个大愛經營厥茶園，將高山茶推廣到各地，甚至國外。看著厥成績，新佳陽泰雅部落个老輩，乜跔核厥腳步，摟撇人工較多个柿樹、蘋果樹，用天然个方式改種茶樹。今這下，賣个高山茶供不應求，想食無先訂，買無哦！

兩毛屑屑中，吾等轉到安排好个接待屋家中，茶个甘甜留在喉嚨，人个情誼園在心肝肚，對面个雪山山脈知得。

作者：劉玉蕉

☆詞彙學習☆

【禁聲】gim` shang+：不發出任何聲響。

【迂】din+：圍繞。

【抽核另命】chiu+ goi+ nang` miang`：聲嘶力竭的喊。

【老頭擺】lo` teu` bai`：年代久遠的從前。

【抓核】za+ hed`：牢牢抓著。

【腦膈肚】no` gag` du`：腦海中。

【翻肚】pon+ du`：嘔吐。

【烏森林】vu+ sem+ lim`：原始黑森林，位於佳陽部落最頂端。

【做綑】zo` liu`：做陷阱。

【摟撇】leu` ped`：挖掉。